

दिनांक 14.07.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- राज्य मंत्रिमंडल की मीटिंग मांय केई खास फैसला करी ज्या- सुनियोजित नगरीय विकास अर मेडिकल टूरिज़्म ने बधावो दियो जावेला।
- तीन नुवी नीतियां रा मजमून मंजूर करी ज्या अर न्यारा-न्यारा महकमा रा सेवा नियमां मांय बदलाव ने मंजूरी दीरीजी।
- प्रदेश मांय केई ठोडां ज़ोरदार बिरखा ऊं जिन्दगी माथे असर पड़्यो-आज सात ठोडां भारी ऊं घणी भारी बिरखा रो रेड अलर्ट।
- एक जिला-एक उत्पाद कार्यक्रम रा तैत आज नई दिल्ली मांय व्ह्या राष्ट्रीय समारोह मांय राजस्थान ने कांसा रा तमगा ऊं नवाजी ज्यो।

राज्य सरकार लारला बरसां मांय प्रमोशन रो फायदो नी लेवण वाळा कर्मचारियां रा प्रमोशन मांय दो साल की छूट देवेला। मुख्यमंत्री भजनलाल शर्मा की सदरत मांय आज व्ही मंत्रिमंडल की मीटिंग मांय ओ फैसलो करी ज्यो। मीटिंग पाछे उपमुख्यमंत्री डॉ. प्रेमचंद बैरवा, कैबिनेट मंत्री जोगाराम पटेल अर सुमित गोदारा खबरनवीसां ने बतायो के मीटिंग मांय ऊर्जा, उद्योग, पर्यटन, नगरीय विकास, भणार्ई-लिखाई अर जमीं आवंटन ऊं जुड़्या केई खास फैसला करी ज्या। वे बतायो के कॉलेज अर यूनिवर्सिटी मांय यूजीसी रे नियमां रे मुजब सीसीए नियम मांय बदलाव ने ई मंजूरी दीरीजी। इण ऊं **करियर एडवांस्ड स्कीम** रा तैत शिक्षकां की पदोन्नति व्हे सकेला। श्री बैरवा बतायो के जल संसाधन विभाग रा सेवा नियमां मांय ई बदलाव करी ज्यो है अर अनुकंपा रा आधार ऊं नौकरी देवण रा मामलां मांय ई रियायत देवण रो फैसलो करी ज्यो है।

खबरनवीसां सागे बातचीत रे दौरान कैबिनेट मंत्री जोगाराम पटेल बतायो के मीटिंग मांय राजस्थान लोक सेवा आयोग मांय सदस्यां की तादाद 7 ऊं बधा र दस करण रो फैसलो ई करी ज्यो।

ई दौरान कैबिनेट मंत्री सुमित गोदारा बतायो के मीटिंग मांय राज्य ने मेडिकल टूरिज्म रा केन्द्र रा तौर ऊं विकसित करण रो फैसलो ई करी ज्यो।

मंत्रिमण्डल री मीटिंग मांय प्रदेश री टाउनशिप नीति, मेडिकल वेल्यू ट्रेवल पॉलिसी – हील इन राजस्थान नीति, राजस्थान निवेश संवर्धन योजना अर राजस्थान सिटी गैस डिस्ट्रीब्यूशन नीति ने ई मंजूरी दीरीजी। मंत्री बतायो के ई सारू राज्य स्तर री निगरानी कमेटी बणावण रो फैसलो ई करी ज्यो।

राज्य सरकार अर गैर-सरकारी अस्पतालां रा नुमाइंदा बीचे आज राजस्थान गवर्नमेंट हैल्थ स्कीम-आरजीएचएस रा बारा मांय बातचीत व्ही। चिकित्सा अर स्वास्थ्य विभाग री प्रमुख शासन सचिव गायत्री राठौड़ सागे व्ही मीटिंग पाछे गैर-सरकारी अस्पतालां रा नुमाइंदा बातचीत ने सकारात्मक बतायी।

सरकार अर गैर-सरकारी अस्पतालां बीचे एकराय व्हेवण पाछे मरीजां ने आरजीएचएस रा तैत बिना नकद चुकारा रे ईलाज रो सुबीतो मिलतो रेहवेला। वे आस जताई के सरकार री ओर ऊं अस्पतालां री जूनी बाकियात रा चुकारा रा बारा मांय बेगा ई हुकम दिया जावेला।

राष्ट्रपति द्रौपदी मुर्मू आज हरियाणा अर गोवा रा नुवा राज्यपाल अर केन्द्र रा राज वाळा लद्दाख रा नुवा उपराज्यपाल री नियुक्ति कर दीनी। पैली वाळा नागरिक उड्डयन मंत्री पुष्पापति अशोक गजपति राजू गोवा रा अर प्रोफेसर आशिम कुमार घोष हरियाणा रा राज्यपाल बणायी ज्या है। श्री कविंद्र गुप्ता ने लद्दाख रा उपराज्यपाल नियुक्त करी ज्या है।

राज्य री सहकारी समितियां कानी ऊं बणायी ज्या सामान अब दुनियाभर रा बाजारां मांय बेचा जा सकेला। ई सारू राजस्थान राज्य क्रय-विक्रय सहकारी संघ लिमिटेड-राजफेड अर राष्ट्रीय सहकारी निर्यात लिमिटेड-एनसीईएल बीचे करार माथे सही करीजी। इण ऊं प्रदेश मांय बणाया जावण वाळा सामान ने दुनियाभर मांय पिछाण मिलेला। आज जयपुर मांय करी ज्या ई करार माथे राजफेड रा प्रबंध निदेशक टीकमचंद बोहरा अर एनसीईएल रा एमडी अनुपम कौशिक सही कीनी।

मौसम विभाग आज कोटा, उदयपुर अर जोधपुर संभाग मांय कठे-कठे भारी बारिश रा आसार जताया है। पाली, राजसमंद, भीलवाड़ा, चित्तौड़गढ़, बूंदी, झालावाड़ अर कोटा मांय ज़बरदस्त बारिश सारू चेतायी ज्यो है। ई सागे ई 10 ज़िलां मांय बरसात रो ऑरेंज अलर्ट जारी करी ज्यो है। मौसम केन्द्र जयपुर रा निदेशक राधेश्याम शर्मा बतायो के आवता दो दिन अजमेर अर जयपुर संभाग मांय कठे-कठे घणी भारी बिरखा व्हेवण रा आसार है।

ई बीचे काल सब ऊं बत्ती करीब 20 सेंटीमीटर बरसात कोटा जिला रा खातोली मांय दर्ज करी ज्यी। बारां, कोटा, बूंदी, राजसमंद, डूंगरपुर, धौलपुर, बांसवाडा अर जोधपुर जिलां मांय ई 10-10 सेंटीमीटर ऊं बत्तो पाणी बरस्यो। प्रदेश मांय बरस रह्या जोरदार मेह रे कारण न्यारी-न्यारी ठौड़ां पाणी भर ग्यो अर आवण-जावण मांय अड़चन आ रही है। केई ठौड़ां गांवाईं हलकां रो खास गेलां ऊं संपर्क टूट ग्यो है। जोरदार बारिश रा असर वाळा हलकां मांय प्रशासन सावचेत है अर लोगां ऊं सुरक्षित ठोड़ां रेहवण री अपील करी जा रही है। एसडीआरएफ री टीमां ई तेज बहाव वाळा हलकां मांय बचाव रा कामां मांय लाग्योड़ी है। जोधपुर जिला मांय पाली-मारवाड़ अर बोमादड़ा रेलवे टेशनानां बीचे पटरियां हेटे ऊं मिट्टी बह जावण अर पटरियां हेटे पाणी भरण रे कारण रेलानां री आवण-जावण माथे असर पड़्यो है। म्हाणा कोटा खबरनवीस बतायो के कोटा बैराज रे आरे-सारे चम्बल नदी रा पाणी भराव रा हलका मांय व्हे रही जोरदार बारिश रे कारण बैराज रा 12 दरुजा खोल र बत्तो पाणी निकाळ्यो जा रह्यो है।

जोरदार बारिश रे कारण नदी-नाळां मांय पाणी उफण रह्यो है। चित्तौड़गढ़ रा नीलिया महादेव कुंड मांय डूब जावण ऊं तीन जणां री मौत व्हे ग्यी, जदके कोटा मांय बरसाती नाळा मांय बह जावण ऊं एक युवती री मौत व्हे ग्यी। रावतभाटा मांय नाळा मांय बह जावण ऊं एक बच्चा री मौत व्हे ग्यी, जदके भीलवाड़ा री छाईबाई नदी मांय बह जावण रे कारण एक जणा री मौत व्हे ग्यी।

जल संसाधन मंत्री सुरेश सिंह रावत कूड़ा-बावड़ियां अर टांका बणावण रा काम मांय गुणवत्ता अर हिफाजत रो पूरो ध्यान राखण अर वां ने पर्यावरण अनुकूल बणावण माथे जोर दीनो है। श्री रावत आज जयपुर मांय जल संरक्षण प्रबंधन अर पाणी ने बेहतर तरीका ऊं काम लेवण रा बारा मांय राख्यी ज्यी कार्यशाला मांय बोल रह्या हा।

भारतीय मानक ब्यूरो अर जल संसाधन विभाग री ओर ऊं राख्यी जा रही दो दिन री ई कार्यशाला रा उद्घाटन सत्र मांय श्री रावत कह्यो के जल संसाधन ऊं जुड़्या कामां मांय गुणवत्ता ऊं जुड़्या मानकां री पूरी पालना करी जावणी चाहिजे। कार्यशाला रा पहला दिन आज जाणकार पाइप लाइन नेटवर्क अर पाणी बचावण ऊं जुड़्या मानकां रे बारा मांय जाणकारी दीनी।

राजस्थान ने एक जिला-एक उत्पाद कार्यक्रम रा तैत आज नई दिल्ली मांय राख्यी ज्या राष्ट्रीय समारोह मांय कांसा रो तमगो दे र नवाजी ज्यो। राष्ट्रीय ओडीओपी पुरस्कार समारोह मांय केन्द्रीय उद्योग मंत्री पीयूष गोयल राज्य ने नवाजो। उद्योग विभाग रा संयुक्त आयुक्त पी.एन. शर्मा ओ ईनाम लीनो। प्रदेश रा रत्न, गहणा, मार्बल, ग्रेनाइट भाटा अर खेती-बाड़ी री भांत-भांत री जिन्सां ओडीओपी हलकां मांय खूब नाम कमायो है।

केन्द्रीय आयुष मंत्री प्रतापराव जाधव कह्यो है के दुनिया मांय आयुर्वेद री पिछाण बधी अर लोग इण ने काम लेवण लाग्या है। वे आज नई दिल्ली मांय चाल रह्या अखिल भारतीय आयुर्वेद संस्थान रा शल्यकॉन 2025 सत्र मांय बोल रह्या हा। श्री जाधव कह्यो के आयुष मंत्रालय आयुर्वेद अर ईलाज रा न्यारा-न्यारा तरीकां रा विकास सागे वां ने आखी दुनिया मांय ओळखाण दिरावणों तैय कीनो है।

सावण महीना रा पहला सोमवार रे मौके आज प्रदेश रा शिव मिन्दरां मांय मोटी तादाद मांय जातरू पूर्या। ई मौके पौ फटतां ई शिव जी रो दूध अर पाणी ऊं अभिषेक करण अर पूजा—अर्चना रो सिलसिलो सरू व्हे ग्यो। ई सागे ई मिंदरां मांय हर—हर महादेव री गूंज सागे माहौल शिवमय व्हे ग्यो। सावन मांय शिव मिन्दरां मांय सोहवणी सजावट करी ज्यी है अर भगवान शंकर ऊं जुड़ी झाकियां सजाई ज्यी है। केई मिन्दरां मांय अभिषेक अर पूजा—अर्चना रो सीधो प्रसारण ई करी ज्यो।

.....